

COMUNICATO n. 3053 del 05/11/2024

La Majon di Fascegn chiama ite la Gran Radunanza

[Ladin] En vender ai 22 de november, da les 5 domarena, te La Gran Ciasa a Soraga, sarà la Gran Radunanza de la Majon di Fascegn. N moment de bilanz ma ence de programazion che chest ent, volù dai ladins per stravardèr e portèr inant sia identità, à l doer ma ence l besegn de spartir con sia comunanza.

Na comunanza che semper de più te chisc ultimes egn se à fat sentir e la ge é stata apede a sia majon, che del 2025 la zelebrarà l 50eisem cedeon.

Te la Gran Radunanza vegnarà portà dant ence la pruma idees per i festejaments del cedeon; n bel travert caraterisà da enrescida, gaissa e condivijion per stravardèr e didèr viver e crescer l'identità, la cultura, l lengaz e la tradizions ladines.

Dai 4 ai 15 de november se podarà empieir ite n formulèr Google moduls olache ge vegn domanà a la jent de palesèr e de manèr ite idees e conscidrazions sun coche ge saessa bel che l cedeon vegne recordà e festejà. L formulèr sarà dat fora sui canai social Facebook e Instagram de la Majon di Fascegn, metù sul sit istituzionèl del ent www.istladin.net, e l sarà ence a la leta sun papier te senta del Istitut.

Sarà n apuntamento emportant per portèr dant la sacotanta ativitèdes del Istitut, del Museo e de la Biblioteca e olache, tres n percors gustegol e desvalif compagnà dai dependents del ent, la jent podarà cognoscer la ativitèdes e dir la sia, portan dant consees, pensieres, idees e, perché pa no, ence critiches costrutives. Filmac, postazions de lurier da proèr e veder per entener che che sozede tedò la coltrines del Tobià de Pieif e te Museo che, enceben che l reste sarà per lurieres per la sajon da d'invern, no l lascerà su de sporjer sia ativitèdes didatiches e de endrezèr neva scomenzadives.

L 50eisem cedeon cognessa esser dassen spezièl e condividù con duc chi che a volù l Istitut, con chi che à lurà e colaborà, co la jent de Fascia e ence co la jent che vegn da foradecà o che da foradecà à sostegnù chesta istituzion. Enc publics o sogec privac, scoles e scolines, istituzions, sociazions, families, ghes, artis, artejegn boteghieres, operadores turistics, giaves, joegn e chi à gust e gaissa podarà dir la sia e scriver ite.

I resultac de chesta scomezadiva vegnarà descòrec fora endèna la Gran Radunanza, olache ensema sarà metù ju l program di festejaments del 50eisem. "Ve speton donca de n muie e ve envion a manèr ite voscia idees per ge fèr festa al Istitut, ajache la Majon di Fascegn l é ence voscia majon!", la engaisa la diretora del ent, Sabrina Rasom.

Informazions sun www.istladin.net/ld/radunanza2024

(S.Ra.)